

# ШОЪЛ ТАВЫСЫ

РЕСПУБЛИКАЛЫК  
ЯМАГАТ-ПОЛИТИКАЛЫК ГАЗЕТА

ГОЛОС СТЕПИ

РЕСПУБЛИКАНСКАЯ  
ОБЩЕСТВЕННО-ПОЛИТИЧЕСКАЯ ГАЗЕТА

№ 52 (8688)

28 ДЕКАБРЬ

2017 йыл

КИШИ ЮМА

КАРАГЫС АЙЫ

1931-нши йылдан алып шыгады

## Янъы 2018-нши йылынъыз бан, аявлы йолдаслар!

### Аявлы дагестаншылар!

Келеяткан Янъы йыл ман ак юректен кутлайман. Ол – биз дайым да суьйиниш эм ийги-танъ туьрленислер болаягына сеним бар аьллерде йолыгатаган йылы, аьелде, балалык шактан суьйикли байрам.

Дагестан – аьдет-йорыкларды аявлап саклап эм янъыды туьзип болааганкуллыкшыаьдемлердинъ ери. Сизинъ ювыкларынъыздынъ эм кардаш-туьганларынъыздынъ, оьсип келеяткан несилдинъ акында ак юректен каьр шегуьвинъиз, байыр куьшлеринъизге ынанымынъыз сизге республика алдында турган енъил туьыл борышларды яшавга шыгармага коьмек этеегинде шекленмеймен.

Баьринъизге де берк ден савлыкты, тынышлыкты эм ярыкландырувды йорайман. Аьр кайсынъыз уьшин Янъы 2018-нши йыл уьстинликлерге етисуьв, ийги ислеринъиз, ой-ниетлеринъиз яшавга толысыниша шыгарув заманы болсын.

Дагестан Республика  
Аькимбасынынъ борышларын  
кесек заманга толтырувшы  
В.Васильев.



### Сыйлы Ногай район яшавшылары!

Сизди келеяткан 2018-нши Янъы йылынъыз бан кутлаймыз, «Ногайский район» МО администрациясы, МР Депутатлар Йыйыны атыннан Сизге коьп ийгиликлер йораймыз.

2017-нши йыл тарихке кетип барады. Тезден ол бизим элимиздинъ, республикамыздынъ, районымыздынъ социал-экономикалык, ямагат-политикалык оьрленуьвининъ япсарларын янъыдан белгилеп, аьвелгидинъ бетлерине айланаяк.

Бу байрамды биз аьр заманда да янъы эм ярък сезимлеримиз эм сенимлеримиз бен йолыгамыз. Янъы йылда аьр биринъиздинъ яшавынъызда таза уьмитлер, уьстинликлер, бийикликлер болсын, бу йыл аьр бир уьйге тынышлык эм наьсип йылы болып келсин. Аьдемлер арасында бир-бирисин аьнламлык, аьдемишлик, танълык, бир-бирисин аявлап битуьв, ийгилик пен катнасуьв – мине бу касиетлер бизим оьрге баруьвмыздынъ эм оьрленуьвимиздинъ аманаты.

Алдыга аьр биримиз ойлар, борышлар саламыз, сол ойлар районымыздынъ, республикамыздынъ эмишлиги мен байланыслы, соны баьримиз де аьнлаймыз.

Сизге эм сизинъ ювыкларынъызга 2018-нши йыл онълы эм берекетли болсын деп йораймыз. Сизинъ ийги аьрекетинъиз эм баславларынъыз уьстинликли болсын, уьйлеринъиз байрам савьлесине толсын!

Янъы йылынъыз бан, аявлы йолдаслар!

«Ногайский район» МО администрация аькимбасы М.Аджеков.  
«Ногайский район» МР Депутатлар Йыйынынъ председатели Р.Насыров.

### Янъы йыл байрамынынъ озгарув программасы

18.00 – «Янъы йыл эртегиси» (Ногай оькимет драмалык театры).  
20.00 – Янъы йыллык театраллык коьрсетуьв.  
21.00 – Етекишлердинъ кутлавлары.  
22.15 – Янъы йыл байрам кийимлерининъ коьрсетуьви.  
23.00 – 23.30. – Янъы йыл байрам дискотекасы.  
23.30. – Фейерверк.

### Сыйлы ногай халкым!

Мине тагы да бир йыл артта калды, ога оьз разылыгымызды билдирейик. Янъы йыл – бизим энъ суьйикли байрамларымыздынъ бириси. Янъы йылымыз капымыздан кагып баслады, ол да бизге онъ болсын! Аьр бир аьелге рахатлык аькелсин, ата-ана баласынынъ тек куьезине коьнъилленсин, аьр бир азбарда яхшылык, куваныш болсын. Баска миллетлер арасында ногай халкым деген ат энъ бийик аьырайлы сырада турсын.

Келеяткан йыл сизинъ уьшин оьрленуьвдинъ, эмишликтинъ эм тил бирликтинъ йылы болсын! Аьр бир уьйге, аьр бир аьдемге куваныш, наьсип, кайратлык эм ийгиликлер аькелсин!

Янъы 2018-нши йылынъыз бан сизди, район яшавшылары!

«Шоьл тавысы» республикалык газетасынынъ бас редакторы Э.Кожасева.

## Хош келдинъ кенъ шоьлиме

Янъы йылда – янъы куьн,  
Янъы йылда – янъы туьн.  
Янъы йыл, сен хош келдинъ,  
Туьрленислер аькелдинъ.  
Эмишлик пен келдинъ ме,  
Берекетти бердинъ ме,  
Кенъ яйылган шоьлиме,  
Туьган оьскен ериме?  
Янъы йыл деп суьйинип,  
Хошлап сени аламыз.

Кенъ шоьлимнинъ тоьриннен  
Орын берип сыйлаймыз.  
Ногай шоьлдинъ ерине  
Янъы йыл эс эттагы.  
Аьр бир ногай уьйине  
Наьсип шашып юртагы.  
Янъы йыл ман яхшылык  
Келсин аьр бир аьелге.  
Яслар салган мырадлар  
Баьри толсын ерине.

САБИРАТ КОЙЛАКАЕВА

# Кутлавлар

**Сыйлы ердеслер!**

Баъринъизди де келеяткан Янъы 2018-нши йыл ман кутлайман!

Янъы йылымыз элимизге, республикага, районымызга янъы яхшылыктар, ийги ислер, илгери етимислер аькелсин. Аьр бир аьдемнинъ коьнъилинде коьп ийги сезимлер тувсын, эткен мырады толсын, алдыдагы йолы яркъ эм таза болсын.

Сизге Янъы йылда онълы берекетти, берк ден савлыкты, уьйкен уьстинликлерди, тынышлыкты эм наьсинпти йорайман!

**М. АВЕЗОВ,**

ДР Халк Йыйынынынъ депутаты.

**Оьрметли ердеслер!**

2017-нши йылымыз тарихке кетеди. Келеяткан Янъы 2018-нши йыл ман аьр кайсымыз да янъы ийгиликлерди, аьрув туьрленислерди байланыстырамыз. Янъы йыл элимиздинъ, республикамыздынъ, районымыздынъ яшавшыларына да коьп онъайлыктар аькелеегине сенемиз эм сога тийисли негиз салынады.

Янъы йыл – ол аьдет бойынша аьел байрамы. Ак юрегимнен баьринъизге де аьел наьсибин йорайман, сизинъ уйлериъизде дайым ийги коьнъиллик, тынышлык, йылувлык эм берекет болсын!

Янъы йылынъыз бан сизди, аявлы авылдаслар!

**М. МАМАЕВ,**

ДР Халк Йыйынынынъ депутаты.

**Аявлы Терекли-Мектеб авыл яшавшылары!**

Сизинъ аьр биринъизди келеяткан Янъы 2018-нши йыл ман кутлайман!

Эндиги де бир йылымыз яшавымыздан тарих бетлерине кетип барады. Оьзининъ ис куьнлери эм байрамлары, кайгылары эм яхшылыктары, маьселелери эм уьстинликлери мен бирге. Босагада – Янъы 2018-нши йыл. Онынъ алдында биз ийги аьдетимиз бен эски йылды йолга саламыз, келеяткан йылга ис планларымызды туьземиз. Биз дайым да ийгиликке, яхшылыкка сенемиз, неге десе Янъы йыл – ол янъырувдынъ, аьрув ниетлердинъ, келеектегиге ымтылувдынъ байрамы.

Янъы 2018-нши йылымыз республикамыз эм районымыз уьшин янъы курылыслардынъ, макулласувдынъ, тынышлыктынъ эм оьрленуьвдинъ йылы болсын. Аьр бир уйге тил бирлик, татымлык, мол берекет, суьйимлик эм наьсип йорайман! Янъы йылынъыз хайырлы болсын!

**З. АДЖИБАЙРАМОВ,**

«село Терекли-Мектеб» СП МО аькимбасы.

Оьзимнинъ эм коллективимиз атыннан сизди келеяткан Янъы 2018-нши йыл ман кутлайман. Алдыдагы йылымызда сизинъ баьринъизге де ал деп ден савлыкты, ян беркликтин, оьз куьшинъизге эм ийгиликке сенимликтин йорайман. Сизинъ янынъызда дайым да тувганларынъыз эм досларынъыз турсын, уйлериъизде эмишлик, суьйимлик эм берекет болсын!

Келеяткан Янъы йылда аьр кимге наьсип, онъ берекет, янъы уьстинликлер, эмишлик болсын!

**Ф. МЕЖИТОВА,**

«Ногайская ЦРБ» ГБУ бас врачы.

**Аявлы район яшавшылары эм окытувшылары!**

Сизди ак юректен келеяткан Янъы 2018-нши йыл ман кутлайман.

Ярасыклы эм нурлы байрам алдында районымыздынъ билимлендируьв учреждениелерининъ куллыкшыларына, аьр бир окытувшыга эткен иси уьшин разылык билдиремен.

Аявлы окытувшылар, сизинъ билимлендируьв тармагында этетаган куллыгынъыз бизим окувшыларымыздынъ аьлигисине эм келеектегисине оьзининъ салдарлы уьлисин косады эм олардынъ оьрленуьвине демевлик этеди.

Аьр бир район яшавшысына берк ден савлык, аьел наьсибин, баьри мыратлар толганын йорайман.

Янъы йылда сизинъ исинъизде бийикликлер, уьстинликлер болсын!

Янъы йылда сизге онъайлык, суьйим эм ийгилик сагынаман.

**К. ОТЕГЕНОВА,**

Билимлендируьв боьлик етекииси.



## 2018-нши йыл!



**БИЛЕСИЗ БЕ?**

## 2018 йылдынъ байрам куьнлери

Россия Федерациясынынъ ис эм социаллык оьрленуьв министерствосы билдиргенлей, Россия Федерациясынынъ Оькимети келеяткан янъы 2018-нши йылдагы байрам эм тыншаюв куьнлерин айырым токтасы ман беркиткен.

Сога коьре, 2018-нши йылдынъ 6-ншы эм 8-нши январь тыншаюв куьнлери (солар ислемайтаган байрам куьнлерине келедилер) 2018-нши йылдынъ 9-ншы мартына эм 2-нши майына коьширилгенлер. 28-нши апрельдеги, 9-ншы июньдеги эм 29-ншы декабрьдеги тыншаюв куьнлери 30-ншы апрельге, 11-нши июньге эм 31-нши декабрьге йылыстырылганлар. Соны ман, россия

гражданларына 2018-нши йылда тоьмендеги тыншаюв куьнлери бериледи:

**30-ншы декабрь 2017-нши йыл – 8-нши январь 2018-нши йыл** – янъыйыллык эм рождество таркавлары;

**23-нши февраль – 25-нши февраль** – Аталыкты саклавы куьнининъ сыйына;

**8-нши март – 11-нши март** – Хатын-кызлар куьнининъ сыйына;

**29-ншы апрель – 2-нши май** – Язлык эм ис байрамынынъ сыйына;

**9-ншы май** – Енъуьв куьни;

**10-ншы июнь – 12-нши июнь** – Россия куьнининъ сыйына;

**3-нши ноябрь – 5-нши ноябрь** – Халк бирлик куьнининъ сыйына.

# Кутлавлар

Сизди келип турган Янъы 2018-нши йыл ман кутлайман!

Янъы йылымыз бийылгыдан да онъайлы, берекетли болсын. Беженлеримиз асыкка толсынлар, юреклеримиз – суьйимликке, юзлеримиз – байрам куьезининъ яркъ савлесине. Аьр бир аьдемнинъ эткен мырады толсын, авыл-элимизге коьп яхшылыктар, ийги туьрленислер келсин.

Баьринъизди де бу сондай ийги байрам ман кутлайман! Сизге – ден савлык, аьел эмишлиги, тил бирлик, узак оьмир эм янъы уьстинликлер!

**А. ПОГОРЕЛОВ,**

«Кизлярский район» МР аькимбасы.

Баьринъизге де бирликтин, тыпаклыктын, аьруьв ислерди йорайман. Янъы йылымыз бизге янъы уьстинликлер аькелсин, янъы оьзгерислер мен суьйинтсин, янъы мырадарымызды эм басавларымызды яшавга шыгарсын. Янъы йыл аьр бир уйге йылы хабарлары ман, яхшы ислери мен кирсин. Сав йыл узагында етимис, эмишлик, тынышлык болсын. Сизге ден савлыкты, наьсинпти, мол онъысты, тынышлыктын йорайман!

**А. ЗИМИН,**

«Тарумовский район» МО

администрациясынынъ аькимбасы.

Аьр биринъизди капымызга келген Янъы 2018-нши йыл ман кутлайман!

Оьтип бараяткан йыл бизим уьшин енъил болып оьтпейди, ама биз алдымыздагы кыйынлыктарды да енъермиз деп сенемен.

Баьринъиз уьшин Янъы йыл янъы уьстинлик, ийгиликке сенимлик эм янъы куьш аькелсин. Баьримизге де аз кайгы, коьп куваныш, яркъ етимислер, белсенлик болсын. Сизге берк ден савлыкты, узак оьмирди, наьсинпти, шат байрам коьнъилди йорайман!

**Э. КАРАГИШИЕВ,**

«Бабаюртовский район» МО аькимбасы.

**Сыйлы ис йолдаслар, баалы ветеранларымыз, савлай Ногай район яшавшылары!**

Сизди оьз янымнан эм иш ислер боьлик коллективин атыннан келеяткан яркъин байрам – Янъы йыл ман ак юректен кутлайман. Бу йылдынъ сырагыларын келтирип, янъы сеним мен, уьмитлер мен йолыгамыз.

2018-нши йылда сиз кайгыруьв, кыйнатув деген не зат экенин билмегенинъизди йорайман. Исинъизде уьстинликлер артсынлар, солардынъ тамамы Ногай районымыздынъ яшавшыларынынъ кавыфсызлыгы эм тынышты яшавы болсын.

Сизге берк ден савлык, тил бирлик, ийгилик эм янъы енъуьвлер.

Янъы йылынъыз бан!

**А. КОЙЛУБАЕВ,**

Россия МВД Ногай районы бойынша иш ислер боьлигининъ етекииси.

**Аявлы хатын-кызлар, савлай район яшавшылары!**

Сизинъ баьринъизди де келеяткан Янъы 2018-нши йылынъыз бан ак юректен кутлайман. Эндиги де бир йылымыз тарих бетлерине оьзининъ яркъин эм эстен кетпес оьзгерислери мен кирди. Баьримиз де Янъы йылга янъы сенимлер мен, таза ойлар ман абытлаймыз.

Мен баьринъизди де шатлыклы байрам ман кутлайман, исинъизде уьстинликлер, аьеллеринъизде уьйкен наьсип эм берк ден савлык сагынаман.

Ниетлеринъиз яшавга шыгарылып, юреклеринъиз суьйинишке толсын!

**С. АБУБЕКЕРОВА,**

Ногай район Хатын-кызлар советининъ председатели.

**Сыйлы район яшавшылары, суьйикли каравшыларымыз, ис йолдасларым!**

Сизди келеяткан 2018-нши йыл ман кутлайман. Янъы йыл байрамы аьр бир инсанга – саьбийге эм ясуйкенге – ортак шынтты уйишлик байрам. Сол куьнлерде биз, аявлы авылдаслар, бир-биримизди кутлап, байрам куьезин боьлисемиз. Солай болып келеятыр эм солай дайым болаяк.

Биз, артистлер, аьр дайым сизи мен. Мен баьрисин де Янъы йыл ман кутлап, баьри ийгиликлерди йорайман.

Алдымызда тагы да бир йыл. Мен сенемен, сол йыл бизге тек ийгиликлер аькелер. Халкымыз Янъы йылды куваныш пан карсы алсын.

**Б. ДЖУМАКАЕВ,**

Ногай патшалык драмалык театрынынъ директоры.

# «Ногайский район» МО администрация аькимбасы Мухтарбий Аджеков: «Бас аьрекетимиз – халкымыз эм онынъ сораваырын шешуьв»

Саьли куьн, 26-ншы декабрьде, Ногай район маданият уьйинде «Ногайский район» МО администрациясынынъ аькимбасы Мухтарбий Кошманбетович Аджековтынъ оз ис орынында оьткен 4 ай ишинде эткен аьрекет акында район яшавшылары алдында эсап беруьв йьйыны болып озды.

Йьйында «Ногайский район» МО администрациясынынъ аькимбасы Мухтарбий Аджеков, район эм авыл депутатлары, ис коллективлери, район яшавшылары катнастылар.

Район етекшисининъ эсап беруьв йьйынынъ район орталык китапхана-сынынъ директоры Сабират Абубекова ашты эм юритти.

Мухтарбий Кошманбетович озининъ район аькимбасы этилинип сайланган куьни – быйылдынъ 18-нши августыннан бугуьнлерге дейим эткен ис аьрекет акында район яшавшылары алдында толы кебинде эсап бермеге шалысты.

Район аькимбасы озининъ соьйлевинде районнынъ маьнели социал-экономикалык тармакларынынъ аьллери эм соларда онлаган йьллардан йьйналган маьселелерди шешуьвди ол озининъ тергеви астына алганын эм соларды район етекшилери республика басшылары алдында токтавсыз коьтерип келетганы акында хабарлады. Республика етекшилери оз ягыннан Ногай районнынъ коьп сораваырын шешуьвге коьмегин этуьвге созь бергенлер. Соны ман бирге ол келеек йьлда район еринде уьйкен авыл хозяйстволык проекти яшавга шыгарылып басла-

наягы акында айырым белгиледи. Ол зат район яшавшылары уьшин янъы ис орынлар туьзбеге, район бюджетине косымша келимлер аькелмеге тийисли.

Муннан сонъ Мухтарбий Кошманбетович район яшавшыларынынъ ога берген сораваырына яваплады. Берилген сораваырынъ арасында район етекшилери район еринде коррупция ман кайтип куьрес юритееги акында сорава да коьтерилди.

– Биз коррупция фактлары акында материаллар йьйнав ниет пен айырым ящиклер илсекпиз. Фактлар яшавда орын тапса, биз коррупцияга катыскан етекшилери, яваплы аьдемлерди ис орынларынан тайдырув сораваын салаякпиз. Коррупция ман куьрес юритуьв – ол бизим ис аьрекетимиздинъ биринши пунктларынынъ бириси болады, – деди М.Аджеков.

Халк район етекшисине берген сораваырынъ хыйлысына яваплар бизим газетада сентябрь-декабрь айларынан бери баспаланып келеди.

Йьйында ногай тилден эм адабияттан окув китаплерининъ етиспевлиги, ногай тилден эм адабияттан бир окув китаби де федераллык окув китаплер сырасына киргистил-



мегени эм соларды сонда киргистуьв кереги акында дуьрыс сорава берилди. М.Аджеков бу сорава да район етекшилери мен ойласылып каралганы эм ювык арада ол озси республика орта-



лыгында сондай маьнели маьселеди тагы бир коьтереегине сендирди.

Терекли-Мектеб авыл яшавшысы

Арслан Бекмурзаев алдынгы депутатлар корпусы осал ислегенин белгиледи эм район етекшисин алдыгдай савлайхалклык кебинде сайламага болмай ма деген сораваы берди. Сога Мухтарбий Аджеков оз ягыннан карсы туьвл экенин билдирди. «Эгер район депутатлар йьйыны карсы туьвл болса, яшавшылардынъ да ойлары билип, сораваы шешпеге болады. Тек 1996-97-нши йьллардагы сайлаваылдагындай халктынъ «кызылларга» эм «акларга» боьлингени керек туьвл», – деди явапка М.Аджеков.

Йьйында район сайлав комиссиясын кайтадан сайлав кереги акында сорава да коьтерилди. Район аьким-

нинъ сайлаваырыннан сонъ комиссия кайтадан сайланаыгын билдирди.

Терекли-Мектеб авыл яшавшысы Асият Манкаева авыл ериндеги аьскер боьлигинде орынласкан радиолокаторлар ман байланыслы йьллап шешилмей келетганын сораваы берди. М.Аджеков бу сораваы район етекшилери аьнлайтаганы эм соны шешпеге шалысаыгы акында айтты.

Таьтли-Булак авыл яшавшысы Самедин Беккишиев районнынъ сувгарув тармаклары дуьрыс кепте кулланув, коьп балалы аьеллерге коьмек этуьв, эски райком меканына музейди коьширмеге ярамай ма деген сораваырын берди. Бу соравага явапка М.Аджеков алдынгы райком меканын ярастырып, сога аьлиги район администрациясын коьширееги акында билдирди. Бу явапты йьйын катнасуьвшылары карс кагуьлары ман йолькты.

Йьйында район етекшисине авылларды сув ман канагатлав, газификация эм янъы мектеблер курув акында сораваы да берилди. Район аькимбасы солардынъ баьрисине де тийисли яваплар берди.

Йьйыннынъ ызында Мухтарбий Кошманбетович сонда катнасканларга разылыгын билдирди эм баьри район яшавшыларын келетканын Янъы 2018-нши йьл ман куьтлады.

**М. ХАНОВ.**  
**Сувьретлерде:** эсап беруьв йьйынында.

## ШАРА

# Янъы йьл алдында

Дагестан Республикасынынъ еринде Южно-Сухокумск каласы, Тарумов эм Ногай район бойынша ПР эм тергев аьрекетининъ 7-нши номерли боьлиги мен алдын шалуьв тергев «Янъы йьл» операциясы озгарылаяк.

Операция барысында Янъы йьл байрамы озгарылаяк объектлерде от туьсуьв кавыфсызлыгын аьжетсизлев шаралар оьтеек – объектлерде от туьсуьвге карсы аьллерди тергев, от туьсуьв кавыфсызлыгына яваплы аьдемлер, организациялар етекшилери мен аьнлатув хабарласув-

лар, от туьскенде аьдемлерди меканнан кайтип шыгармага керек акында, пиротехникалык алатлар сакланатаган, шыгарылатганы эм сатылатганы объектлерде от туьсуьвге карсы аьллерди тергев.

Дагестан Республика бойынша Россия МЧС ПР бас управлениеси, тергев аьрекетини эм алдын шалуьв исининъ 7-нши номерли УНД боьлиги от туьсуьвлер болдырмас уьшин беркитилген талаплавларды толтырыныь деп шақырады.

Янъы йьл шараларды уйгынлав эм озгарув заман-

да шара басланаыктан алдын меканды от туьсуьвге карсы амаллар алынганын тергемеге керек. Меканда шыгатаган эки капы болмага керек, терезелер темир теллер мен ябылмага керек туьвл эм олар 2 шарлактан тоьмен болмага керек. Елка берк турмага керек эм бутаклар тамларга эм йога-рыга тиймеге ярамайды. Эгер меканда электроярык йок болса, шара куьндиз озгарылмага керек.

Шараларды киртли терезели меканларда озгармага, прожекторлар, атылатганы алатлар кулланмага яра-

майды, фейерверклер этпеге ярамайды, оннан от туьспеге болады. Балаларды тез тутанып янатаган кийимлерге кийиндирмеге, шара боляткан меканда ярыкты тымдырмага ярамайды. Капыга бара-таган йол бос болмага керек. От туьскен заманда «01», мобильли телефоннан «112» эм «101» номерлерге тел сокпага керек.

**Дагестан Республика бойынша Россия МЧС ПР бас управлениеси, тергев аьрекетини эм алдын шалуьв исининъ 7-нши номерли УНД боьлиги.**

## «НОГАЙСКИЙ РАЙОН» МО АДМИНИСТРАЦИЯСЫНДА

# Шатлыкларда сак болынъыз

Коьплеген Федераллык законлар негизинде «Ногайский район» МО еринде Янъыйьлык байрамлар куьнлеринде пиротехнический алатларды кулланувдан аьдемлерди кателенуьвден эм облимнен саклав мырадат «Ногайский район» МО администрациясынынъ аькимбасы М.Аджековтынъ токтасы кабыл этилинди. Сол токтаска коьре янъыйьлык байрамлары оьтеек меканларда пиротехнический алатларды кулланмага, солай ок керекли техникалык аьллер туьзбей, фейерверклер озгармага ярамайды.

«Ногайский район» МО еринде озь аьрекетин бардыратаган предприятелиер, учреждениелер, организациялар етекшилери Янъыйьлык байрамды оьткеруьв мезгилинде тоьмендеги борышларды толтырмага кереклер:

– яваплы аьдемлер мен от туьсуьвге карсы йосыкларды тутув, байрам оьтеек меканларда эм олардынъ касында пиротехнический алатларды кулландырмас акында инструктаж юритпеге;

– от туьсуьвде кулланылатганы баслапкы алатлардынъ барлыгын эм кулланув-

га яравлыгын тергемеге;

– 1-3-нши приложение-лер мен келисте аьрекетлемеге;

– от туьсуьвге карсы кавыфсызлыкты тутувга яваплы аьдемлердинъ дежурствосын уйгынламага.

Ногай районы бойынша Россия ОМВД (А.Койлубаев) байрам шаралар озгарув ерлерде от туьсуьвге карсы йорыкларды тутувга, солай ок пиротехнический алатлардынъ (оьзлери эткенлерди аянав мырадат) сатылуьвине тергев салувды куьшлендирмеге маслагат берилди.

«Яслык» деген яслар

орталыгы (С-А.Сарсеев) «Ногайский район» МО предприятелиер, учреждениелер, организациялар эм яшавшылар арасында пиротехнический эм янъыйьлык алатларды (гирлянда, свеча эм с.б.) куллануьвине эм от туьсуьвге карсы йорыкларды тутувга аьнлатув куллыклар юритуьвди озгармага тийисли.

Токтастынъ толтырылуьвине тергев салув «Ногайский район» МО администрация аькимбасынынъ ямагат кавыфсызлык бойынша орынбасары Б.Ярлыкаповка тапшырылган.

## МАЬСЕЛЕ

# Ойлап каранъыз оьзинъиз

**Кайбир аьдемлер Янъы йьл алдында соны байрамшылав ол бизим халкка келиссиз аьдет деген хабарды таралтадылар.**

Биз Янъы йьлды байрамшылавга элимиз бен бирге солай да бек уьйренгенмиз эм ол бизим яшавымызда бала заманнан алып эсейген шагымызга дейим уьйкен орынды бийлейди. Дуьрыс, юз йьллар артта халкымыз Янъы йьлды байрамшыламаган. Ама ызгы заманларда бирер туьрка аьлим-леримиз Аяз Атай, Карлыгыз, елка терегин ыспайлав, маскарад – булар баьриси де бизим туьрк ата-бабаларымыздан шыккан деген ойын яклайдылар. Ойлап каранъыз энди-ги...

Эндиги биз Янъы йьл авыл-элимизге керексиз деген ойды алып карайык. Аьдем яшавы ентиллерден туьвл. Боьтен де аьлиги заманлар бизди онда-мунда ювыртып, коьнъиллеримизден коьп йьлы затларды уьзип аькетди. Тек байрам куьнлеринде, той-яхшылыкларда, оьмираллада (йогаыда белгиленгенлер соларды да тайдырув керек дегенди айтадылар) биз бир-биримизди хаьтерлемеге, йокламага, яхшылык йорамага заман табамыз.

Янъы йьл – ол уьй, аьел байрамы. Сол куьнлерде уьй ошагы янына, буьрынгы термедеги ошак янына карт та,

яс та йьйылгандай, биз баьримиз де бирге йьйыламыз. Коьп йьлы эскеруьвлер мен боьлисемиз, ясуьйкенлерге, балаларга савгалар беремиз, оларга, бир-биримизге ийги йоравларымызды айтамыз. Янъы йьлдынъ йьлуьвлыгы, елка терегининъ туьрли туьсли отлары коьнъиллеримизди ярык таза сезимлерге, байрам куьезине толтырады. Мен бу байрамда бир келиссизлик те коьрмеймен.

Йок дейдилер Янъы йьлга карсы болганлар, бу байрам халктынъ коьп акшасын аькетди, туькен иелерин байытады. Янъы йьл байрамын аьр биримиз озь эбимизге, кисемизге коьре уйгынлап оьткеремиз. Байлар – оьзинше, ярлылар – оьзинше. Алдын да солай болган, аьли де солай.

Соьзди тамамлай келип, бизим патшалыгымиз дин патшалыгы туьвл, светский экенин кайбиревлердинъ эслерине салмага туьседи. Аз десенъыз, демократиялык патшалык. Сол себептен байрамшыламага суьйгенлер байрамшылайды, суьймегенлер байрамшыламайды. Аьр кимининъ де толы ыхтыры бар.

**М. ЮНУСОВ.**



БАЙРАМ

## Ашык эсиклер куьни



Оьткен юма сонъгы куьн, йылдынъ тамамланув шагьнда, А-Х.Ш. Джанибеков атындагы орта мектебинде уйкен байрамга айланды, ата-аналар мектебте конакта болдылар.

Бу шарадынъ бас мырады ата-аналарды мектебинъ окытув эм тербиялав аьрекети мен таныстырув эди.

Мундай шаралардынъ озгарылувы ата-аналар ман балалардынъ катнаслыгын беркитеди.

Бу куьн А-Х.Ш. Джанибеков атындагы мектебинде юзден артык окувшылардынъ ата-аналары конакта болдылар. Оларга деп мектебинъ окытувшылары 40-а ювык ашык дерислер эм класстан тыс шаралар озгардылар. Мен озим де сол мектебте окыйтаган окувшылардынъ анасы болып, билимли, талаплы окытувшылардынъ озгарган дерислерине шайыт болдым. Элбетте, дерислер кызыклы эди, бу куьн балалардынъ да ийги абзирлиги коьринди. Бир дерис ишинде сулыплы окытувшылар кайдай да педагогикалык методикалар да кулландылар, компьютер негизинде де куллыктар эдилер. 8-нши «а» класс сабатынде окытувшы Ольга Александровна оз окувшылары ман саваплык акында соьйледи, эм соны ман байланыслы болган мысаллар да келтирилди. Балалар оз ойлары ман боьлистер, бизим районымызда бар «Инсан» саваплык фонды акында да хабарладылар. Класс сабаты кызыклы эди. Аьлиги янъы технологиялар, хатер деген арт сандыкка тасланган, заманларда окытувшылардынъ

сол темага соьйлеви бизим балаларымызга бек пайдалы. Ясуьйкенлеримиздинъ айтувына коьре, сондай пайдалы хабарласулар бизим бир неше яс ата-аналардынъ озьлерине де керегеди.

Бу куьнди озгараяктан алдын А-Х. Джанибеков атындагы мектебининъ окытувшылары алдыларына – ата-аналарга балаларынынъ кайтип дерислерде озьлерин юритетаганын, кайтип ислеьтаганын коьрсетуьв борышы салынган эди. Меним ойыма коьре, сол борыш толтырылды. Балаларынынъ бактысына ушкары карамайтаган ата-аналар бу шарада да ортакшылык этилер. Карагыс айынынъ 16-нши куьнинде районымыздынъ энъ де уйкен мектеблерининъ бириси кайдай ийги шара озгарды, энди соны баска окув учреждениелери де озьлерине уьлги этип аларлар деп ойлайман. Бу балаларга да, ата-аналарга да, окытувшыларга да пайдалы болмаса, зарары болмас. Мен бу куьн толы коьнъл мен уьйиме кайттым, уьйге келип оз балаларым ман олардынъ дерислерде кайтип олтыратаганлары акында, коьрсеткен билимлерин акында йлы хабарладык, терисликлерин, етимислерин белгиледик. Эш те, соьйлегенлеримиз, коьргенлеримиз келекте оз емисин берер.

А-Х.Джанибеков атындагы окытувшылар коллективине ак юреклик савболсынымды билдиремен. Сизинъ этетаган куллыгынъыз элимизге пайдалы.

**Г. САГИНДИКОВА.**

**Суьвретте:** ашык эсиклер куьнинде берилген дерис.

**Сыйлы авылдаслар!**

*Сизди келяткан Янъы 2018-нши йыл ман кутлайман!*

*Аьдем яшавьнда эски йылды йолга йылы эскеруьвлер мен озгарып, келип турган янъысын уйкен шатлык пан йолыгатаган ийги аьдет бар. Сол аьдетимиз бизди бирлестиреди, Янъы йылда янъы куьш пен, янъы кепте куллык этуьвге, янъы уьстинликлерге етисуьвге даьвлениреди.*

*Баьринъизге де ден савлыкты, коьп яхшылыкларды, сый-абырайды, оьрленуьвди, суьйимликти йорайман!*

**«Ногайский район» МО администрациясынынъ маданият боьлигининъ етекииси**

**Я.Кудайбердиев.**

**РАЙОН ОРТАЛЫГЫНДА**

## Сыйлы Мавлид айында

Карагыс айынынъ 17-нши куьнинде Ногай район орталыгы Терекли-Мектеб авылынынъ маданият уйинде, сыйлы Мухаммад Пайхамбардынъ (Алла-Таала оны озь саламласын

эри Алла-Таалага нешаклы ювык болса, сол шаклы олар бир-бирине де ювык боладылар. Аьр бир хатын эрине суьйикли болмага шалысды. Эгер эри хатынына разы болса, Алла-Таала да оны

нинъ куллыкшысы Фари-зат Бегендикова балаларды Ислам дини бойынша тербиялав акында билдируьвин этти, РФ Язувшылар эм Журналистлер союзларынынъ агзасы Салимет



эм сыйласын) тувган айында хатын-кызлар мавлиди озгарылды. Бу кешликте ярыкландырув боьлигининъ етекшиси Аиша Муллаева аьр биринъиз меним айтканын ман разы боларсыз деп ойлайман: бизим наьсибимиз, аьел наьсиби – хатынлар колында, – деди Аиша Муллаева.

Мавлидтинъ барысында Абу Ханифа атындагы хатын-кызлар медресесининъ окытувшысы Мунира Компазова Мухаммад Пайхамбардынъ (Алла-Таала оны озь саламласын эм сыйласын) яшавы акында хабарлады. Солай ок ярыкландырув боьлиги-

ман разы болар. Оьз эринъди кайтип наьсипли этпеге, кайтип ога ийги хатын болмага керексинъ? Сизинъ аьр биринъиз меним айтканын ман разы боларсыз деп ойлайман: бизим наьсибимиз, аьел наьсиби – хатынлар колында, – деди Аиша Муллаева.

Мавлидтинъ барысында Абу Ханифа атындагы хатын-кызлар медресесининъ окытувшысы Мунира Компазова Мухаммад Пайхамбардынъ (Алла-Таала оны озь саламласын эм сыйласын) яшавы акында хабарлады. Солай ок ярыкландырув боьлиги-

Майлыбаева кайнанасы ман келинининъ катнаслыгы акында хабарлады, Абу Ханифа атындагы медресединъ окувшысы Фатима Муллаева «Каьмбиллик» деген темага оз докладын этти. Окытувшы Диана Ахмедова анъ-нызам баалыклары акында йыйылганларга анълатув этти.

Кешликти медресединъ окувшылары Куран, нашидлер окувы ман ярасыкладылар. Келген конакларга туьрли шаралар озгарылып, зияпетлер берилдилер.

**Г. КУРГАНОВА.**

**Суьвретте:** мавлид озув шагьнда.

**РЕСПУБЛИКАМЫЗ ЕРИНДЕ**

## Оьтеяткан 2017-нши йылдынъ

\* 2017-нши йылда «Шоьл тавысы» республикалык газетасынынъ редакциясында Дагестан Республикасынынъ Аькимбасынынъ Грантына «Аталыгым – Дагестан» телестудиясы куллык этип баслаган.

\* 2017-нши йылдынъ канътар айынынъ 20-нши куьнинде, Дагестан Республикасынынъ Унцукуль районында «Ахуьльго» деген маданият-тарихлик комплекс – бизим ортак бактыдынъ мемориалы ашылган.

\* 2017-нши йылдынъ увьт айында Ногай районында кара малдынъ, койдынъ терисин асыллав бойынша аьлиги заманга келисли, «Агросоюз» СПОК етекшиси Мухтарбий Аджековтынъ куьш салувы ман, цех оз аьрекетин баслаган.

\* 2017-нши йылдынъ увьт

айынынъ 8-нши куьнинде Дагестан Республикасынынъ Баспа эм информация бойынша министерствосына Рашид Акавов етекши болып беркитилген.

\* 2017-нши йылдынъ навруз айында Ногай районында оз аьрекетин бардыратаган балалар яратувшылык уьйи 60 йыллык мерекесин белгиледи.

\* 50 йыл артта Ногай районынынъ орталыгы – Терекли-Мектебте анъ, бес йылдан сонъ суьврет ясав эм баска кол оьнер мектеби ашылган.

\* Навруз айынынъ баслапкы куьнлеринде Россия Язувшылар соьзынынъ агзасы, Насими атындагы баргыдынъ иеси, ногай шаири Мурат Авезовтынъ токтастырувы ман, редакторы Айнара Нур-

гишиевадынъ куьш салувы ман «Ювсан» газетасынынъ биринши номери дунья ярыгын коьрген.

\* 2017-нши йылдынъ Навруз айында Ногай район маданият уйинде, коьптен ниетленген, «Оьнерине бай халкым» деп аталган 1-нши халклар ара КВН фестивали озгарылган.

\* Дагестан Республикасынынъ Аькимбасынынъ буйрыгы ман 2017-нши йыл – Каспий йылы деп белгиленген.

\* 2017-нши йылдынъ навруз айынынъ 21-22-нши куьнлеринде Кизляр районынынъ Ново-крестьяновка авылында «Биз бирге» деп аталып ногай миллет-маданият фестивали озгарылган.

\* 2017-нши йылдынъ коькек айынынъ басында ногай йывар

ясымыз Узаир Найманов Ставрополь крайынынъ Георгиевск каласында озган «Оьз юлдызынъа ынан» деген фестивалининъ энъ уьвшиси болган.

\* 2017-нши йылдынъ курал айынынъ 23-нши куьнинде Махачкалада «Дагестан хатынлар соьзы» ямагат организациясынынъ съезди озгарылды.

\* 2017-нши йылдынъ курал айында Казахстан ериннен конаклар келип кеттилер. Олардынъ келуьвининъ бас мырады – Ногай миллетли халк пан генетикалык ювыклыкты излев.

\* 2017-нши йылдынъ тамбыз айынынъ 14-нши куьнинде ногай халкынынъ курултайы болып озды.

\* 2017-нши йылдынъ тамбыз

айында Россия авыл хозяйство министерствосынынъ Авыл ерлерин оьрлентуьв департаментининъ етекшиси Владимир Свежец Ногай районындагы «Агросоюз» авыл хозяйстволык потребительлик кооперативинде конакта болган.

\* 2017-нши йыл – Дагестан Республикасынынъ адабиятында Фазу Алиева йылы.

\* 2017-нши йылдынъ шилле айында «Ногайский район» МО администрациясында Дагестан Республикасынынъ Оькиметининъ кенъейтилген йыйыны болып озды. Сонда ДР Оькиметининъ орынбасары Р.Джафаров, ДР Аькимбасынынъ республикадынъ сырт территориялык округындагы толы ыхтыярлы ваькили В.Деревянко, миллет политика бойынша мини-

Сыйлы ногой халкым!

Биз баъримиз де тезден Янғы 2018-нши йылды йолыгаякпыз. Янғы йыл – бизим энъ суыйикли байрамларымыздынъ бириси.

Аър аъдем уьшин Янғы йыл янғы уьстинлик, ийгиликке сенимлик эм янғы куьш аькелсин. Тыпаклык халкыма, тил бирлик эл арасында, исте оьрметлик, абырай болсын!

Сизге аян аъдем наъсибин, ден савлыкты, эмишликти эм оьзингиз эткен мыратларынгыз толганын йораймыз!

Россия Федерациясынынъ Язувшылар союзынынъ агзасы,  
Карамай-Шеркеш Республикасынынъ Халк язувшысы Фарида Сидихметова.

АСТРАХАНЪ ЕРИНДЕ

# Ярыкландырувшыдынъ йолын ызлап

Бу йылдынъ 8-нши декабринде Растопуловка авыл орта мектеби оьткен «Джанибеков окувлары» шарасынынъ катнасувшыларына эсиклерин кенъ ашып, конаксуьрлигин коьрсетип, ногой шай ман, боьреклер мен хош алды.

тирди. Тарихши Рамиль Ишмухамбетов оьз исининъ тамамы болатан ногой тилинде йыйынтыгы ман таныстырды. Балаларды ногой тилди эм маданиятты яйылдырувга уйретеганы акында мектеб етекшисининъ орынбасары

«Джанибеков окувлары» шарасы бойынша шаир, суьвретши, хореограф Сраждин Батыровтынъ ярлык яратувшылык яшавы акында Дагестан Республикасыннан ямагатлык аьрекетшиси Арслан Бакиевтинъ фильми коьр-



Мектебинъ залында Джанибеков окувларынынъ катнасувшылары бир-бири мен маьселелер эм алдыдагы мырадлар ман боьликтилер. Шара «Эдиге» ногой маданиятлык яслар орталыгы ман уйгынланган эди. Россиядынъ Язувшылар союзынынъ Астраханъ боьлигининъ етекшиси Ю.Щербаков коьширилген ятлавларын окып эсит-

ры Асель Ишназарова да хабарлады. Келеек йылда Абдул Хамид Шаршенбиевич Джанибековка эстелик салынаягы айтылды. Проекттинъ уйгынлавылары ярыкландырувшыдынъ немереси Марат Джанибеков эм Абдурахман Махмудовтынъ етекшилиги мен «Яркакон» деген фирмасы болады.

сепилди. Шара Растопуловка авылынынъ маданият орталыгында «Дослар тоьгеринде» деген яслык программасы ман, ногой ашханасынынъ асларын татувы ман, ногой биювлери, йырлары бойынша мастер-класслары ман тамамланды. **Суьвретте:** шарадан оьзгерис.

АВЫЛ МЕКТЕБИНДЕ

# Окытувшыдынъ исине келеектеги бойсынады



Янғыларда Нариман авыл орта мектебинде «Профстарт» деп аталып, яс окытувшыларынынъ биринши профсоюз форумы оьтти. Мунда конакта РФ илим э билимлендирув куллыкшыларынынъ профсоюзыннынъ район комитетининъ председатели З. Аюпова, район Депутатлар Йыйыныннынъ председателинынъ орынбасары У.Шандавова, Махачкаладан келген РФ илим э Билимлендирув профсоюз куллыкшыларынынъ рескомында яс педагоглар советининъ председатели Р.Махмудова эм онынъ орынбасары Г.Магомедов, яс окытувшылар ортакшылык эттилер.

Форумды Ногой РК профсоюзыннынъ яс окытувшылар советининъ председатели Насипхан Джумаева юритти. Бас деп созди ол Зарета Аюповага берди. Сонъ Нариман авыл мектебининъ етекшиси Д.Эсиргепов конакларды хошлап, окытувшы – дуньяда энъ де маьнели, кызыклы, керекли ислердинъ бириси, неге десе ол окувшыды тербиялайды, эм окытувшыдынъ куллыгына элимиздинъ келеектегиси бойсынатыганын белгиледи. Увылбийке Донбаевна сосындай форумлар келеекте де озгарылса бек пайдалы болагын эм окытувшыларды кызыксындырган соравларды ол район администрациясына билдиргенин айтты. Солай ок, Руманият Абдувагабовна Ногой РК профсоюзыннынъ яс окытувшылар советининъ ваькиллерининъ ийги исин, талабын белгиледи. Р.Махмудова оларды баска районлардынъ яс окытувшыларына коьрим алмага болган уьлги эсабында айтатанын анълатты, Гаджи Имангазиев болса, Ногой шоьлде биринши кере келгенин эм ногой халкынынъ конаксуьрлигине, ийгер-

лигине, ислерине яваплык пан каравына бек сукланганын айтты.

Шарадынъ шатлыклы кезегиннен сонъ, окытувшылар эм балалар бавларынынъ тербиялавылары мастер-класслар уйгынладылар, айтпага: «Йыл тербиялавысы» конкурсыннынъ муниципаллык кезегининъ енъуьвшиси Мадина Юнусова « Мен педагог! Ол меним шакрыуым» деген оьз презентация, «Юлдыз» балалар бавынынъ тербиялавысы Айбике Максудова «Экологиялык ассорти» КВН, «Йыл окытувшысы» конкурсыннынъ зональный кезегининъ енъуьвшиси Тамара Адиева «Дерис художестволык шыгарма эсабында» мастер-класс, РФ ортак билимлендирувининъ ат казанган куллыкшысы Сафият Аджигельдиева «Келеекке меним ийгерли абытым» деген тоьгерек стол, «Айсылув» балалар бавынынъ тербиялавысы Эльвира Манкаева « Оьз оьзи мен келисуьвде» психологиялык тренинг, «ДР энъ де ийги окытувшысы» конкурсыннынъ катнасувшысы Залина Аджибаева «Окытувшыдынъ визитная карточкасы» мастер-класс. Сонъ балалар бавларынынъ тербиялавылары Эльвира Бегалиева, Джамиля Аманбаева («Ногой Эл»), Апипат Рамбердиева («Айсылув»), туьрли амаллар кулланлып, суьврет ясав, кувыршаклар азирлев мастер-классларын, «Ногой Эл» балалар бавынынъ тербиялавылары «Репка» эртегисин коьрсеттилер. Сонъында форум катнасувшылары суьвретке туьстилер эм бай сыпырага шакрылдылар. Яс окытувшыларынынъ биринши профсоюз форумы кызыклы аьлде оьтти.

**Н. КОЖАЕВА.**  
**Суьвретте:** форумнан коьринис.

# эстеликли оьзгерислери

стри Т.Гамалей эм сондай баскалар катнастылар.

\* 2017-нши йылдынъ шилле айынынъ 18-нши куьнинде «Ногойский район» МО акимбасынынъ исин юритуьвши болып, Мухтарбий Аджеков беркитилди.

\* 2017-нши йылдынъ шилле айынынъ 29-ншы куьнинде ногой шаири, журналист Гульфира Бекмуратова 50 йыллык мерекесин белгиледи.

\* 2017-нши йылдынъ сары тамбыз айында «Машук-2017» яслар форумы Сырт-Кавказ федераллык округында болып озды, сонда бизим районымыздан яс окытувшы Насипхан Джумаева «Этностильде аьлиги замандагы кийимлер шыгарув студиясы» деген проекти мен ортакшылык эткен.

\* 2017-нши йылдынъ сары тамбыз айынынъ 20-ншы куьнинде Махачкаладынъ Киров районынынъ Сулак авылында 11-нши савлай ногойлар ара эркин куьрес бойынша «Шоьл баьтирлери» турнири оьтти.

\* Сары тамбызайынынъ 18-нши куьнинде «Ногойский район» МО администрациясынынъ акимбасы болып, Мухтарбий Кошманбетович Аджеков беркитилди.

\* 2017-нши йылдынъ кырк кийик айынынъ 24-нши куьнинде шаир, журналист Магомет-Али Ханов тувганлы 55 йыл толды.

\* 2017-нши йылдынъ кырк кийик айынынъ 24-нши куьнинде, согыс Данък орденининъ толы иеси Алимхан Боранбай увылы Асановтынъ эстелигине багыслан-

ган волейбол турнири 45-нши кере озгарылды.

\* 2017-нши йылдынъ казан айынынъ 3-нши куьнинде Дагестан Республикасынынъ Акимбасынынъ куллыгын юритуьвшиси болып, Владимир Васильев беркитилген.

\* 2017-нши йылдынъ казан айында Ногой район прокуратурасында ДР прокурорынынъ 1-нши орынбасары Заур Тарханов ис аьрекетин мен болып, Россия Федерациясынынъ Генераллык Прокурорынынъ буйрыгы ман, Ногой район прокурорынынъ куллыгын юритуьвши Анварбек Сейтиев Ногой район прокуроры этилинип беркитилген.

\* 2017-нши йылдынъ казан айынынъ 20-ншы куьнинде Ногой

ЦРБ етекшиси этилинип Фаризат Межитова беркитилген.

\* 2017-нши йылдынъ казан айынынъ 24-нши куьнинде Ногой районында Дагестан Республикасы ман уйгынланган «Яшавынъ калай, авылдас?» проекти ишинде кызыклы шара озгарылды. Бизим районымызга ДР миллет политика бойынша министри Татьяна Гамалей келди.

\* Казан айынынъ 7-нши куьнинде, дунья тарихинде уйкен орынды алган, Уллы Октябрь социалист революциясына 100 йыл толды.

\* 2017-нши йылдынъ казан айынынъ сонъгы куьнлеринде Ногой районынынъ Червленные Буруны авылында янғы ярастырылган маданият уйи куланувга берилген. Авыл яшавшыларын

сондай оьзгерис пен кутламага ДР маданият министри З.Бутаева келген эди.

\* 2017-нши йылдынъ караша айынынъ 12-нши куьнинде Ногой район маданият уйинде язда болган V Савлайроссиялык ногой халкынынъ курултайынынъ сырагыларына багысланган конференция болып озды.

\* 2017-нши йылдынъ караша айында Арслан Бакиевтинъ куьш салувы ман Сраждин Батыровтынъ эстелигине деп салынган «Элгезер» кинофильми коьрсетилди.

\* 2017-нши йылдынъ карагыс айынынъ баслапкы куьнлеринде Орта-Тоьбе авыл яшавшыларынынъ коьплеген йыллар караган мырадлары толды. Авылда коьгилдим оты янды.

## ПОЛИЦИЯ КУЛЛЫКШЫСЫ

### Иси мен баскаларга коьрим



Полиция куллыкшылары аьр заманда да бизим тынышлыгымызды саклауда. Солардын бириси — полиция подполковниги Арслан Рамазан уулы Эдильбаев.

Коьплеген йыллар ислеиди ол ерли полиция боьлигинде, оьзининь кыйыны ман, токтамастай аьрекетти мен полицейский эл арасында, бирге ислеитаган йолдаслары арасында сый-абырай казанган.

Астрахань каласында Россия МВД орта кеспили милиция школасын, Волгоград каласында Россия МВД йогары следствие школасын битирип, Арслан Рамазан уулы участковый инспектор болуп ис аьрекетин баслаган. Бугуьнлерде ол ерли полиция боьлигининь ямагат

йорыгын саклав бойынша полиция начальнигининь етекшисининь орынбасары болуп ислеиди. Ислеген йылларында полиция куллыкшысы Сый грамоталарга, баргыларга тийисли болган.

Энь де ийги полиция куллыкшысы деп белгиленген ердесимизди эм онынь аьелин келеяткан Янъы йыл ман кутлап, аьли де бийикликлер, беркден савлык эм аьел наьсбин йораймыз.

**Г. БЕКМУРАТОВА.**  
**Суьврете:** А. Эдильбаев.

## МЕДИЦИНА КУЛЛЫКШЫСЫ

### Берген антына алал



Мине 23 йыл бойы Ася Казманбетовна Нарыкова оьзи сайлаган кесписине алал болуп келеди. Ася Казманбетовна Ногай районынын Червленные Буруны авылында туьуп-оьскен. Ерли мектебте билим алып, кыз Москва каласындагы И.М.Сеченов атындагы медициналык академиясынын лечебный боьлигин 1994-нши йыл етимисли тамамлаган. Сол йыл ок, ол район орталык больницанын балалар туьув боьлигинде неонатолог врач аьрекетин яваплы, бажарымлы толтырып келеди. Оьзи 23 йыл минсиз аьрекетти уьшин ол коьп кере ДР Савлык саклав министерствосынын, район орталык больницасынын етекшилиги атыннан Сый грамоталары ман, разылык хатлары ман савгаланган. Онынь суьврети коьп кере район Сый тактасында да орын алган.

Ол Гиппократка берген антына алал куллыкшы болуп калмай, наьсипли ана да болады. Айна кызы анасынын йолын ызлап, бугуьнлерде Кисловодск каласындагы медколледжининь 2-нши курсынынь студенти болады.

Сыйлы кеспидинь иеси Ася Казманбетовнага келеятрган янъы 2018-нши йылда беркден савлык, узак оьмир, исинде йогары етимислерди, ойлаган мыратлары толганын сагынамыз.

**Г. НУРДИНОВА.**  
**Суьврете:** Ася Нарыкова.

## БИЛИМЛЕНДИРУЪВ КУЛЛЫКШЫСЫ

### Энь де ийги окытувшы



Оьтип баратаган йылдын караша айында рай-

онымыз бойынша «Йыл окытувшысы-2018» шарасы оьтти. Сол шарада район мектеблериннен тогыз окытувшы катнасты. Солардын ишинде энь ийги болуп, биринши орынга А-Х.Джанибеков атындагы мектебинь англис тилинен окытувшы Изабелла Оразбаева (суьврете) тийисли болган эди, оннан сонь ол Дагестан Республикасынынь сырт зонасында озгарылган «Йыл окытувшысы» шарасында катнасып, уьшинши савгалы орынга тийисли болган.

Алдыда шаранын республикалык кезеги,

сонда да биз ога янъы еньювлерди йораймыз.



## СОЦИАЛЛЫК КУЛЛЫКШЫСЫ

### Яхшылык аькелер ниети мен



Аьр бир йыл оьз белгиси мен тарихке кирип кете береди. Дурысын айткан-

да, йылдын озувы, аьдем яшавынынь да эсап беруьви болады. Аьр бир тар-

макта да ис тамамы келтириледи, ис бойынша алдышы аьдемлер де белгиленидлер.

Бу йылгы тамамларга коьре, социаллык тармагы бойынша Кумлы авыл социаллык куллыкшысы Зумруд Исаева (суьврете) белгиленген. Ол оьз исин белсен оьзине тапшырылган аьдемлерине яхшылык аькелер ниети мен бардырады.

## МАДАНИЯТ КУЛЛЫКШЫСЫ

### Суьйинишли эм эстеликли болуп оьтти

Озыпбараяткан 2017-нши йыл бойынша халкымыздын маданият куллыкшылары арасында «С.Батыров атындагы балалар саният школасы» МКУ ДО директоры, Патшалык ногай халк саз алатлар оркестрининь дирижеры Анвар Шораевич Аджибаевтинь аты аталды.

Анвар Аджибаев уьшин озып баратаган 2017-нши йыл бос кепте кетпейди. Ол районнынь саният школасында ислегенли 20 йыл толды. (Дурысында онынь ис стажында 25 йыл, неге десе ол Астрахань консерваториясында окыган йылларында да ислеген).

Болса да, онынь уьшин суьйинишли эм эстеликли йылларынынь бириси оьтип бараяткан йыл болады, быйыл Анвар Дагестан Республикасынынь ат казанган маданият куллыкшысы деген сыйлы ат пан савгаланды. Янъыларда, 15-нши декабрьде, Астраханьде болуп оьткен Савлайроссиялык домбыра шертуьвшилер конкурсында школадынь тербиялануьшысы Башир Мусаев пен Алибек Эдильбаев 2-нши дережели дипломларын, Кадрия Джумакова конкурста 3-нши дережели лауреат атын казанганлар.

Быйыл саният школасынынь суьврет



боьлигининь окувшылары Алия Насырова, София Мусаева, Алия Сулейманова да республикалык «Гамзатовские странички» деп аталган конкурс-выставкасында катнасып, баргылы орынларды алганлар.

Анвар Аджибаевке эм ол етекшилейтаган саният школасынынь ис коллективине эм яс оьнерлерине Янъы 2018-нши йылда коьтериньки етимислерди, коьнйилли кайратлыкты йораймыз.

**М. ЮНУСОВ.**  
**Суьврете:** А.Аджибаев.

## СПОРТСМЕН

### Исин юреги мен сайлаган

Спорт пан кишкейден бактысын тар байлаган ясларымыздынь бириси болады Азамат Арсен уулы Кокоев. Азамат Арсен уулы спорттынь эркин куьрес кеби мен тек оьзи кызыксынып калмай, оьз тербиялануьшыларында да спортка суьйимин оьстирип келеди. Бугуьнлерде етимисли тренерининь етекшилиги астында 70-ке ювык тербиялануьшылары эркин куьрестинь усталыгына уьйренип келедилер. Азамат Кокоев асылы ман Терекли- Мектеб авылыннан болады. Ол Арсен мен Нафисат Кокоевлердинь тунгыш аьвлети болады. Орта мектебти тамамлаган сонь, яс Астрахань каласындагы халклар ара юристлик институтынынь социал-ыхтыяр канагатлав бойынша боьлигин тамамлап, юристлик аьрекетин



«Азалия» деген супермаркетинде етимисли бардырады. Бугуьнлерде онынь сылуьв кызы Сумайа да яс аьелдинь куьезин арттырып, оьстирип келеди.

Азамат Арсен уулын Янъы 2018-нши йыл ман кутлап, онынь кеспилик

эм тренерлик аьрекетинде бийик етимислер, еньювшы тербиялануьшыларынынь саны йылдан-йылга оьсип келгенин йораймыз.

**Г. РАМАЗАНОВА.**  
**Суьврете:** Азамат Кокоев оьз еньювшы тербиялануьшылары ман.



# Кайтип йолыкпага керекпиз?

Ийт – табиятка коьре уйир болып юретаган айван. Сога коьре келеятырган 2018-нши йылды коьп аьдем болып йолыкпага керек. Сол байрамды сиз не шаклы коьп аьдем болып йолыксаньыз, сол шаклы байрам иеси – Сары ийтке ярарсыз.

Эгер сиз Янъы йылды аьелинъыз бен йолыгатаган болсанъыз, байрам фейерверки атылганнан сонъ, баьринъызге де йыйылып, кырга шыкпага керек болады.

Ийт кырда туратаган, орамлар ман кыдыратаган айван болады, сога коьре йылдынъ

басланувы ман аьр бир аьдем кырга, ярым саьатке болса да, шыкпага керек. Ийт соны баалайды.

Ийт уьндемеслерди суьймейди, ол – баьри затты да билмеге суьбетаган айван, сога коьре туьрли кызыклы ойынлар да йылды йолыгув байрамына буршав бермес.

2018-нши йылды кайдай кийимде йолыкпага керек?

Келеяткан 2018-нши йылды йолыкпага деп аьзирленсенъыз, саргылт, алтын яде болса, кара туьсли кийим кийинъыз.

Саргылт туьслер йыл иесининъ туьси, алтын туьслер –

аьр байрамнынъ белгиси, кара туьс болса, кайсы заманларга да келисли, модадан бир де таймайды. Сонынъ уьшин кийген кийиминъызге де каранъыз, айлак кара да келиспес, коьп алтын туьсли кийим де коьзге туьсер, баьри зат та келисли эм оьлшемли болмага керек.

Эсинъызде болсын, бу йыл айлак ашык кийимлер келисли туьвл, узун коьйлеклер, белдемелер модада. Оьтип баратаган йыл – кызыл отлы кораз, оны авыстырып, сары ийт келеди. Эгер отлы кораз йылы кызуьвлы эм кызыклы болган болса, ийт йылы, тынык, бир йол ман бар-

мага керек.

Эр кисилердинъ кийимлеринде айырым белгилер йок, оларга йылы свитер кийсе де болар. Эгер эр кисилер куллыгында ис йолдаслары ман йылды йолга салмага кешлик озгарагаган болса, енъил жекет киймеге болады. Ама кийген кийиминъызге уьстепей этип, айырым белгиси болган галстук, кисесиннен ушы шыгып турган бетявлык сизинъ кийиминъызди ярасыклар.

Янъы йыл аьелинъызге хайырлы аягы ман кирсин!

*Аьзирлеген*

**Г. Курганова.**

## Сыпыра ярасык болсын

Янъы йыллык сыпырады аьзирлев – ол энъ де яваплы, соны ман бирге тыныш болмаган борыш. Уьй бийкеси аьзирлеген зияпетлер тек даьмли туьвл, ярасык та болмага тийислилер. Янъы 2018-нши йыл – Сары ийттинъ йылы. Сога коьре ога ярайтаган азыкларга эс этейик. Бас деп сыпырады ярасыклавдан баслайык. Аьдетинше, баьримиз де байрамларда ярасык савытларды шыгарамыз, сыпырага янъы яюв тоьсеймиз. Бу йыл ак, акшыл, сары туьсли яюв куллансанъыз, ийги. Сыхырлы аьл туьзбеге ярдам этетаган майшыракларды айлак коьп салманъыз, боьтен де ийиси болганларды, ийт отты эм ийисли, солай ок баалы затларды суьймейди. Конакларга кулланмага салынган салфеткалар яювдынъ туьси мен бир болсын, кагыттан этилингенлеринде ийттинъ суьврети болса, тагы да яхшы. Эндиги азык аьзирлевге коьшейик. Ийт болса, ас куьшли суьеди эм оны сайламайды, сога коьре янъы йыллык сыпыранъызда туьрли аслар, боьтен де этген аьзирленгенлери коьп болсын.

**Койдынъ**

**кабыргалары**



2 килограмм койдынъ кабыргаларын эки кесекке балта ман шабынъыз, олар айлак узун болмасын, сонъ юьвп, курытынъыз. Кабыргаларга туз бан бурыш себип араластырынъыз.

Кыздырылган табага бир аз сары май ман кендирмай куйынъыз эм кабыргаларды салып саргылт болганша кувырынъыз. Кувырылганнан сонъ олардынъ баьрисин де косып табага салынъыз эм, отты аста этип, 150 мл коньяк, 15 тис сарымсак, 150 мл сув косынъыз. Оннан сонъ табанынъ капкашын яьвп, 1 саьат

аста оттынъ уьстинде койынъыз, аьр бир 20 такыйка сайын асты булганъыз.

**Джиз**



Бизге керек азыклар: 1,5 кг койдынъ эти, 1,5 кг картоп, 500 грамм бадыржан, 400 грамм болгарский бурыш, 200-300 грамм куйрык май, куркума, зира, бурыш, туз.

Казанда куйрык майды иритинъыз, куьйип кетпесин деп каранъыз, сонъ кесеклерге боьлинген этти, сонъ картопты, болгарский бурышларды, ызында бадыржанларды салып, саргылт туьсли болганша аьрисин айырып кувырынъыз.

Бадыржанлар кувырылган-

нан сонъ, босатылган казанга кайтадан этти, кувырылган картопты, кувырылган болгарский бурышты, сонънда кувырылган бадыржанды косып, специалар косынъыз. Белгиленген специаларды яратпайтаган болсанъыз аваслыгынъызга коьре авыстырып каранъыз. Сонъ казанга кайнаган исси сувды куйып, капкашын яьвп, бир саьат узагына аста оттынъ уьстинде койынъыз.

Аьзир джизди сыпырага салаатып, уьстине укроп яде петрушка ман ярасыкламага боласыз.

**«Елкага ойыншыклар»**



Бизге керек азыклар: тавыктынъ коькиреги – 300 грамм,

пыслак – 100 грамм, козлар – 100 грамм, юмыртка- 2, майонез – 4 уьйкен касык, черри бадыржан – 7-9, маслины – 10-12, укроп, ясыл соган, сарымсак – 2 тис.

Кайнатылган тавыктынъ коькирегининъ этин кишкей кесеклерге боьлинъыз, юмырткады, пыслакты теркадынъ кишкей ягыннан шыгарынъыз, укропты кесинъыз, сарымсакты уватынъыз. Баьрисин де терен савытка салынъыз. Эки кесекке боьлинген черри бадыржанларды ортасы этип, терен савытка салынып аьзирленгенлерден кишкей топлар ясанъыз. Блендер кулланылып уватылган козларда топларды авнатынъыз. Маслинады, эки кесекке боьлип, топлардынъ йогарына салынъыз, соьйтип ясыл соганнан аьзирленген ойыншыкларга йип ясанъыз.

**«Мандариновый шок» салаты**



100 грамм каты пыслакты кишкей доьрткил кесеклерге боьлинъыз, мандаринди тазалап, тилимлерин 2-3 кесекке кесинъыз, 2 тис сарымсакты уватынъыз. Аьзирленген пыслакты, мандаринди, сарымсакты косып булганъыз. Суьисенъыз, майонез косынъыз.

Биз сизге байрам сыпырасын аьзирлев бойынша оьз маслагатларымызды бердик. Солай ок даьмли аслардан эм сыпырады ярасык кепте безеклендируьвден оьзге коьтерилис коьнъил акында мутпанъыз. Янъы йылда сизге наьсип, онъайлык йораймыз!

*Аьзирлеген*

**Н.Кожеева.**

# Янъы йыл кешесинде (хабар)

Янъы йыл да босагадан келмеге бек асыгып туры. Оны баьрисиннен де бек юреги телезип, Эмирбек саклай эди, неге десе атасы ога: «Эгер сен Янъы йылга мага дневнигынъде тек «беслер» аькелсенъ, мен сага бир савга этермен», – деген эди. Бала да оьзининъ соьзинде болды: окув йылынынъ яртысын ол тек ийги белгилер мен битирди. Школадан Сый грамотасын да алган эди. Соны ман онынъ коьнъили бек шат. Оны айтпага уьйде атасы йок. Ол эртенъги шакта район орталыгына кеткен, аьли де келмеген. Эмирбек болса, коьзлерин район бетиннен келетаган йолдан алмайды эди.

Арасы коьп заман кетпей, машинадынъ сеси шыкты, эм Эмирбек юьврып азбарга шыкты эм атасынынъ коьлигининъ келип токтавын карап турды. Атасынынъ келуьвине уьйде баьри зат та аьзир, сыпыра аьр не туьрли затларга толысып токтаган. Анасы да эм Эмирбектинъ аданаслары да аталарын куьтедилер. . .

Эндигиси баьриси де эски йылды йолга салмага деп олтырдылар. Олардынъ ортасында бизим кишкей Эмирбек те бар. Ол бир атасына, сонъ анасына эм оннан сонъ аданасларына карап алады. Онынъ юреги телезийди эм атасына окув йылынынъ яртысын тек ийги белгилер мен битиргенин айтып мактанмага суьеди. Оннан бек – атасы айткан соьзин тутып, ога савга берерме экен деп.

Уьйдегилер оьтип бараятырган эски йылда болган, коьрген эм эслеринде калган затлары акында хабарлайдылар. Соьз айтув сонъында бизим кишкей Эмирбекке де етти. Ол соьзин уьйде дерисин аьруьв этетаганы, мектебте дерислерде коьлын коьтерип, сораьларга яваплар бермеге шалысатаганы акында айтты.Эм бирден токтады – атасына карап калды... Атасы да оннан коьзин алмай карайды.

– Мен, атам, сенинъ айткан соьзинъди тутарсынъ деп сенемен, – деди, бираз мактана берип, Эмирбек эм, юьврып барып, дневнигин аькелди эм ондагы болган баьри де беслерин коьрсетип шыкты. Атасы суьйинди эм, дневнигин коьларына алып, тешкеруьвли кепте карады. Сонъ баьрисине де карай берип:

– Меним увылым, йигит. Атасына тек «бес» белгилерин аькелген. Соьзин тутты. А мен де оьз ягымнан соьзимди тутканман, – деди.

– Кайда, аьше савганъ? – деди тынышсызланып, Эмирбек те.

– Бар, балам, бар, тек Янъы йыл баслансын, мен сени Янъы йыл ман кутларман эм савгады тапшырарман, – деди атасы да.

Заман кетеди. Янъы йыл да келди деп занъ согылады. Уьйдегилер бир-бирисин кутлайдылар, ййгиликлер йорайдылар.

Кутлавлар, йоравлар биткеннен сонъ, Эмирбектинъ атасы кисесиннен бир янъы эм ыспайы болган сотовый телефонын шыгарды эм увылына карай берип:

– Бь сага Янъы йыллык савгам! – деди.

Баьриси де суьйиндилер эм Эмирбектинъ Янъы йыллык савгасын карап алдылар.

**А. КУЛТАЕВ.**



## Янъы йылда таза болсын уьмитлер

«ДЭП-29» боьлик етекшиси **Солтан Валиевке**

Яман йоллар аькеткенде

алыска,  
Сени дайым эсимизге аламыз.  
Ярты йолда коьлик батып  
калганда,  
Куьрсинемиз, уйкен ойга  
каламыз.  
Бериледи неше кере  
буйрыклар,  
Юрер ме экен ийги йол ман уныклар?



Россия МВД Ногай районы бойынша  
иш ислер боьлигининъ етекшиси  
**Абдурахман Койлубаевке**

Янъы йылда таза болсын  
уьмитлер,  
Ашылынмай кыянатлык  
калмасын.  
Халкымыздынъ тынышлыгын  
саклава  
Арымасын ийгитлеринъ,  
талмасын.



«Межрегионгаз» Махачкала ООО Ногай район  
территориаллык участогынынъ етекишиси  
**Махмуд Кареевке**

Байрам кеше йылы уьйде  
олтырып,  
Янъы йылды хош алмага суьемиз.  
«Газ болмаяк» деген сувык  
хабарды  
Сени бир де аькелмес деп  
сенемиз.



Ногай патшалык театрынынъ артисти  
ногай халкынынъ йыравшысы **Узаир Наймановка**

Кремль залда Ногайымды  
данъклаттынъ,  
Коьнъиллерге коьнъил косып  
йырынъ ман.  
«Халк артисти» деген  
сыйлы атына  
Етисерсинъ Янъы йылда  
сыйынъ ман.  
Сени буьгуьн ак юректен  
кутлаймыз,  
Йылувлукка эм суьиймге ораймыз.



## Ап-ак кысым

Болса болсын сувык, карлы, аязлы,  
Кыз мезгилге сукланаман, суьемен.  
Коьнъилимди коьтереди  
танъ сазлы,  
Бактым мынан байланысын  
сеземен.

Анам кыста тувганыма  
суьйинген,  
Ап-ак койын сайлап берген  
нашакам.  
Кенъ шоьллигим ак кийимге  
кийинген,  
Ак карлар ман коьн ойларым  
байланган.

Терезединъ оьрнегине карасам,  
Бала шагым коьз алдыма келеди.  
Янъы йылга куьшак алган  
яс атам  
Кара шаштан карын суьртип  
куьледи.

Колдан эткен шанам эске  
туьседи,  
Орамдагы кардан тувган  
карт бабай,  
Шав-шув этип балалар кырда  
юреди,  
Кешке дейим бузда ойнап,  
эш тонъмай!

Мине тагы ушадылар ак карлар,  
Баягыдай коьнъилимди коьтерип!  
Ап-ак болып тыныш яткан  
данъыллар  
Озып кеткен оьмирлерди эскерип.

Ап-ак кысым, юмаклыгынъ  
кутылмай,  
Ак ниетке ювыркандай орашы!  
Кара ерге сен синъмеге асыкнай,  
Дерт таркатып таза йырынъ  
толгашы!  
САЛИМЕТ МАЙЛЫБАЕВА.

## Калинин авыл яшавшысы

Маутали Байтувович эм Салимет Баетовна Кельдасовларга  
бирге аьел курып яшаганлы 50 йыл толганы ман

Келеекте куьнлеринъиз  
Алдынъгдай бай болсын.  
Уьйинъизде берекет  
Мол тоьгилсин, таймасын.  
Картлык тувыл кув шашлар,  
Онынъ уьшин кыйналманъыз.  
Узак болсын оьмиринъиз,  
Йылларынъызды санаманъыз.

Кутлавшылар: кеделер - Аскерхан, Кайтархан, Муратбек,  
кызлар - Джамиля, Марина, келинлер, куьевлер, уныклар эм ийенлер.



## Терекли-Мектеб район больницасынынъ коллективи эм врач Зульфия Омурзаковна Телемишевага

Ийгиликке багытслайсыз яшавды,  
Кудай берсин сизге момай куватты.  
Аьдемшиллик ярасады инсанга,  
Орыннынъизда сиз алгансыз сол атты.  
Куллыгынъизда, табынъшлар мол болып,  
Етимислер, уьстинликлер йораймыз.  
Баьри болган мырадларынъыз толып,  
Ак юректен Янъы йыл ман кутлаймыз.

Кутлавшылар: Н.Арыкова, Х.Аджимуллаева,  
М.Муслимова-Червленные Буруны авыл яшавшылары.



## Терекли-Мектеб авыл яшавшысы Сталинат Ибрагимовна Арслановага 28-нши декабрьде белгиленеек мерекеси мен

Аьлиги сыйлы мерекенъ  
Эки кере айлансын.  
Оза берсин йылларынъ,  
Ден савлыгынъ саклансын.  
Кызганмайын мен сага  
Юректегин айтайым.  
Узак оьмир, мол насип  
Энъ алды ман йорайым.



Кутлавшы: Л.Уразаева.



## Меним атым Кызыл боьрк

Кызыл боьрким ярасык,  
Асыгаман аьеме.

Ормандагы боьриден  
Кыска йол ман кетемен.  
Дорбамда бар боьреклер,  
Аьем кайтип суьйинер.

Г. БЕКМУРАТОВА.

## Кесесиннен:

1. Эрте де юрер, кеште де юрер,  
бир абыт ер бара алмас.
2. Аяктынъ муьшеси.
4. Эр аьдемнинъ аты.
7. Ушарымды ел билер,  
токтарымды тел билер.
8. Шоьл деген созге синоним.

## Солдан онъга:

2. Кыр айваны.
3. Юмырткадан эм пыслактан  
аьзирленетаган  
ногай асынынъ аты.
5. Бурынгы ногай йырыннынъ  
аты.
6. Ана – казна, ... ез.
8. Юйрик аттынъ туьрлиси.
9. Балыктынъ аты.
10. Бурынгы ногай ойыны.



«ШОЬЛ ТАВЫСЫ»  
(ГОЛОС СТЕПИ)

+6

ТОКТАСТЫРУВШЫ:  
Дагестан Республикасынынъ Баспа эм  
информация министрствосы.

Бас редактор  
КОЖАЕВА Э.Ю.

Дагестан Республикасы бойынша Байланыс информациялык технологиялар эм  
коьлем коммуникациялар тармагында тергев салув бойынша Федераллык служба  
управленисинде регистрацияланган.

Регистрациялык номери ПИИ №ТУ 05-00359 (12 декабрь 2016 й.)

Колязбаларга рецензия берилмейди. Олар кери ызына кайтарылмайдылар. Авторлар  
ой токтастары редакциядыкы ман келиспеске боладылар. Авторлар азылмалары уьшин яваплылар.  
ДР-нынъ Баспа эм коьлемлик коммуникациялар бойынша комитети.

Баспалавга кол басылув заманы – 17 саватте. Баспалавга кол басылган – 16 саватте.

Адрес редакции и издателя:  
368850, Республика Дагестан, Ногайский район,  
с.Терекли-Мектеб, ул.К.Маркса, 49  
Газета «Голос степи».  
Электронный адрес: sholtavisi@mail.ru

Официальный сайт газеты (www.golos-stepi.ru)

Телефоны:  
Общий отдел – 21-4-71  
Индекс – 51365

Газета выходит 52 раза в году.  
Тираж – 3000 экз.

Цена – 5 рублей.  
Реклама и объявления публикуются  
по договорным ценам.

Газета отпечатана в типографии  
ГАУ РД «ИД «Дагестан»  
по адресу:  
367018, ДР, г.Махачкала,  
Проспект Петра 1, 61.